

АКАФИСТ СВЯТОМУ БЛАГОВЕРНОМУ ВЕЛИКОМУ КНЯЗЮ ДАНИИЛУ, МОСКОВСКОМУ ЧУДОТВОРЦУ

Кондак 1

Избранный чудотворче и предивный угодниче Христов,/ града Москвы и державы Российския крепкое ограждение,/ раздоров и нестроений искоренителю,/ благоверный княже Данииле, похвальная восписуем ти,/ к раце мощей твоих притекающе./ Ты же, яко имеяй дерзновение ко Господу, от всяких нас бед свободы, зовущих:// Радуйся, преподобне княже Данииле, Московский чудотворче.

Икос 1

Ангелов Творец и Господь во дни великих бед и напастей, обышедших страну нашу от нечестиваго царства агарянскаго, восхотев людем страждущим утешение даровати, яви тя, княже Данииле, яко плод красен от чресл великаго князя Александра;/ людие же, о рождении твоём радости исполнившеся, взываху ти сицевая:

Радуйся, корене благочестиваго прозябёние;/ радуйся, добродетелей отца твоего и матере наслédниче.

Радуйся, рождением твоим люди града Владимира возвеселивый;/ радуйся, грядущую славу Москвы предвозвестивый.

Радуйся, избранниче Бóжий;/ радуйся, правило веры благочестивыя.

Радуйся, образе кротости духовныя;/ радуйся, Бога, яко истиннаго Отца нашего, издетска познавый.

Радуйся, яко Иосиф, от братии твоея досаждения сладце претерпёвый;/ радуйся, последи и братию свою в любовь себе призывавый.

Радуйся, преподобне княже Дании́ле,/ Московский чудотво́рче.

Кондак 2

Видяще ближнии твои, блаженне день от дне во благочестии ты возрастающа, и не точию млеком матерним, но паче благодатию Божию питаема, радовахуся и, Господа о сем хваляще, взываху: Аллилуиа.

Икос 2

Разум богопросвещен имея, уразумел еси, всехвальне, по словеси апостольскому, яко нужнейши всего есть благочестие, имже и потщался еси обогатити душу твою, в молитвах и научении словеси Божии всеусердно пребывая. Того ради людие ублажаху тя сице:

2

Радуйся, молитвенниче теплѣйший;/ радуйся, послушниче Евангелия усѣрднейший.

Радуйся, добродетели высокия в сердце твоём вкоренѣвый;/ радуйся, в заповедех Господних вся дни живота твоего ходѣвый.

Радуйся, образом жития твоего мир посреде братии водворѣвый;/ радуйся, Господа твоего паче всех возлюбѣвый.

Радуйся, положити душу свою за други своя непрестанное желание имѣвый;/ радуйся, благодать Господню в сердце свое заключѣвый.

Радуйся, и тело свое тою просветѣвый;/ радуйся, оное и по смерти нетленно сохраниѣвый.

Радуйся, преподобне княже Даниїле,/ Московский чудотворче.

Кондак 3

Сила Вышняго укрепляло тя, блаженне, егда в кротости и в смирении души твоея возрастая, уготовлял еси себе на служение княжеское и о помощи небесней молился еси, взывая Богу: Аллилуиа.

Икос 3

Имея присно в души твоей глагол Господень, пророку реченный: "На кого воззрю токмо на кроткаго и смиреннаго, и трепещущаго словес Моих", потщался еси, святе, оными добродетельми себя украсить. Того ради ублажаем тя сице:

Радуйся, подвижниче доблий, на высоту добродетелей возшедый;/ радуйся, нищетою духовною Царствие Небесное стяжавый.

Радуйся, кротости ради землю обетования наследивый;/ радуйся, правды и истины паче всего искавый.

Радуйся, чистотою сердца твоего Господа созерцавый;/ радуйся, миротворец нарочит в житии своем явивыйся.

Радуйся, изгнания правды ради смиренно претерпевый;/ радуйся, мзду вечную добродетельми стяжавый.

Радуйся, чистоты душевныя и телесныя сокровище;/ радуйся, любви и кротости Христовы вместилище.

Радуйся, преподобне княже Даниїле,/ Московский чудотворче.

Кондак 4

Бурею агарянского нашествия людие российстии потрясаеми, на тя, всечестне, яко на избранника Божия, взираху и, под кров твой державный прибегающе, защищение и утешение приимаху, вкупе с тобою взывающе Богу: Аллилуиа.

Икос 4

Видяще, святе, братия твоя отрока тя еще мала суща, наследия отча лишити ты умыслиша и удел малейший, Московский, точию вдати ти изволиша;/ ты же, кроток сый и незлобив, ничтоже противовещал еси и за обидящих тя Господеви молился еси. Сего ради ублажаем тя сице:

Радуйся, кротости Христовы подражателю;/ радуйся, предивный нестяжателю.

Радуйся, удел твой малейший возвеличивый;/ радуйся, всего себе воле Божией предавый.

Радуйся, от Него токмо Единого помощи искавый;/ радуйся, богатство тленное презревый.

Радуйся, сокровища духовная возлюбивый;/ радуйся, от юности в благодати у Бога и человек возраставый.

Радуйся, яко и по скончании земнаго жития твоего тую же благодать сугубо восприявый;/ радуйся, яко и мы благодати Божия по молитвам твоим сподобляемся.

Радуйся, преподобне княже Данииле,/ Московский чудотворче.

Кондак 5

Боготечней звезде подобяся, на земли течение твое светло совершил еси, благоверный княже Данииле, лучи святости и потопы милости всем изливая;/ ихже ради и в сонме святых пребываеши, поя с ними: Аллилуиа.

Икос 5

Слышавше ближний и дальний, яко в малем еще граде Москве на высоте стола княжескаго возоблистал еси, преславне княже Данииле, под сень крилу твоею притекаху, похвалы таковыя ти приносяще:

Радуйся, княже благосердый, любовьию своею вся покрывай;/ радуйся, владыко прелюбивый, бедствующыя защищай.

4

Радуйся, мудрость отца твоего, князя Александра, восприимчивый;/ радуйся, страны Московския утверждение.

Радуйся, державы Российския украшение;/ радуйся, Церкви Христовы похвале высокая.

Радуйся, людей российских упование благонадежное;/ радуйся, тобою бо во едино братство совокупаемся.

Радуйся, яко твоим научением от распрей свободяемся;/ радуйся, заповедей Божиих верный исполнитель.

Радуйся, преподобне княже Данииле,/ Московский чудотворче.

Кондак 6

Проповедник Царствия Божия явился еси, благоверный княже Данииле: над людьми бо своими царствуя, слезу всяку от лица страждущих отымал еси, подвизая звати всех: Аллилуиа.

Икос 6

Воссиял еси, яко пресветлое солнце, на престоле Московстем, благоверный княже Данииле, величием души твоея и добродетельми всю землю Российскую озаряя и подвизая всех ублажати тя сице:

Радуйся, мужу желаний духовных;/ радуйся, стяжателю даров небесных.

Радуйся, милосердия сокровище неисчерпаемое;/ радуйся, кротости настаивниче.

Радуйся, заповедей евангельских делателю неленостный;/ радуйся, нищету вольную Христа ради возлюбивый.

Радуйся, сиротам и вдовицам отче благосердный;/ радуйся, людем твоим помощниче богодарованный.

Радуйся, в чине властителя кротость детскую проявивый;/ радуйся, душу твою в храм Божий добре претворивый.

Радуйся, преподобне княже Данииле,/ Московский чудотворче.

Кондак 7

Хотяй Всевидец Господь прославити тя, блаженне, постави тя владыку преславна во смирении людем Своим, иже и взирающе на тя, и добродетелей твоих богатству чюдящися, пояху Ему: Аллилуиа.

Икос 7

Новаго и дивнаго устроителя земли Российския вемы тя, княже Данииле, кротостию бо, смиренномудрием, братолюбием и мудростию небесною княжение Московское возвеличил еси и сильно сотворил еси е. Сего ради прими от нас сицевая:

Радуйся, мудрость Соломонову стяжавый;/ радуйся, кротость Давидову восприявый и тою враги твоя победивый.

Радуйся, многии други себе стяжавый;/ радуйся, стольный град твой храмы Божиими украсивый.

Радуйся, величию Москвы тем послуживый;/ радуйся, войне Христов неодоленный.

Радуйся, от бед и скорбей всем скорое прибежище;/ радуйся, от всех зол твердое защищение.

Радуйся, унывающим доброе вразумление;/ радуйся, всем братолюбцем присное ободрение.

Радуйся, преподобне княже Данииле,/ Московский чудотворче.

Кондак 8

Странника и пришельца себе на земли быти помышляя, час кончины твоя пред очима твоима присно имел еси и сего ради обитель иноком во славу тезоименитаго ти преподобнаго Даниила возградил еси, идеже молитвы твоя Господеви возсылал еси, поя Ему: Аллилуиа.

Икос 8

Всего себе от юности Господу возложив, вся дни живота твоего, благоверный княже, Тому усердно работал еси и, ко блаженному успению достиг, в мире глубоце дух свой Ему предал еси. Людие же княжения твоего, окрест гроба твоего собравшися, пояху ти сицевая:

Радуйся, княже наш превожделенный, ко Господу отошедый;/ радуйся, нетленное тело твое нам оставивый.

Радуйся, ароматы добродетелей твоих нам благоухай;/ радуйся, сиянием небеснаго света озаренный.

Радуйся, обилием любви твоя вся удививый;/ радуйся, и врагом твоим благое упокоение у себе устройвый.

6

Радуйся, крепость державы твоя тем созида́вый;/ радуйся, наследником твоим присное научéние.

Радуйся, гроб твой, аки краеугольный камень, граду Москве положи́вый;/ радуйся, яко молитва твоя о людех и по смерти не оскудева́ет.

Радуйся, преподобне княже Дани́ле,/ Московский чудотво́рче.

Кондак 9

Вси небеснии чини и святых собори радостно тя прияша, богомудре, подвиг земнаго течения своего добре совершивша и к вечному животу пресельшася, идеже с ними поеши: Аллилуиа.

Икос 9

Витий человеческих уста не возмогут изрещи пречуднаго прославления памяти твоя, угодниче Божий, егда бо гроба твоего место забвению предадеша, сам яве предстал еси юноше благочестивому, господина месту тому себе нарицаю, и князя Иоанна обличая, и глаголя: "Чесо ради предал мя еси забвению? аще же и забвен аз тобою, не забы мя Господь". Мы же, явление Твое благоговейно почитающе, сице вопием:

Радуйся, града нашего Москвы Богом данный покрови́телю;/ радуйся, обители твоя неусыпный храни́телю.

Радуйся, яко и по успении твоём нас не оставля́еши;/ радуйся, яко милосердие Божие о гресех наших умоля́еши.

Радуйся, мзду трудов твоих восприя́вый;/ радуйся, небесною славою душу твою осия́вый.

Радуйся, наследников твоих добрый учи́телю;/ радуйся, к добродетели твердый тем наста́вниче.

Радуйся, всем людем благий пред Богом предста́телю;/ радуйся, молитвы их к Престолу Его́ вознося́й.

Радуйся, преподобне княже Дани́ле,/ Московский чудотво́рче.

Кондак 10

Спастися всем хотя́й Господь вельможу некоего, гроб твой, святе, поправша, недугом порази, обаче согрешение свое познавша и прощение от тебе приемша помилова, да и мы вси, достойно почитающе тя, благодарно вопием: Аллилуиа.

Икос 10

Стену неборимую и забрало крепкое граду Москве и всей державе Российской Господь дарова ты, блаженне, верным в скорбех и нуждах пребыстрое заступление, да зовем ти сице:

Радуйся, призывающим ты во благое скорый помощниче;/ радуйся, чистоты душевныя и телесныя сокровище.

Радуйся, душевных и телесных недугов целителю;/ радуйся, державы нашея утверждение.

Радуйся, Церкви Российской украшение;/ радуйся, яко отец чадолюбивый, чада твоя назираяй.

Радуйся, яко воевода непобедимый пределы земли нашея ограждаяй;/ радуйся, небрегущия о святыне страхом вразумляяй.

Радуйся, яко кающимся скорое прощение испрошаеши;/ радуйся, яко благим подвигам тех научаеши.

Радуйся, преподобне княже Данииле,/ Московский чудотворче.

Кондак 11

Пение всеумиленное прими от нас, прехвальне, и молитвы, приносимыя тебе, не презри: к тебе бо в скорбех прибегаем и пред гробом твоим слезы проливаем, зовуще: Аллилуиа.

Икос 11

Светозарна светильника благодати яви тебе всех Творец, силою бо, данную ти свыше, юношу при гробе твоем от одра смерти возставил еси. Сего ради ублажаем ты сице:

Радуйся, милостивый скорбящим помощниче;/ радуйся, сосуде, Святаго Духа исполненный.

Радуйся, дарами Того обогащенный: радуйся, сими дарами и молящихся тебе обогащаяй.

Радуйся, ко Святей Троице дерзновение велие стяжавый;/ радуйся, дерзновение сие на помощь людям направляяй.

Радуйся, силу чудес от Бога приявый;/ радуйся, за грешныя Господа умоляяй.

8

Радуйся, любви и кротости Христовы вмести́лице;/ радуйся, беспомощных скорый помо́щниче.

Радуйся, преподобне княже Дани́еле,/ Московский чудотво́рче.

Кондак 12

Благодатию, данною ти свыше, недуги исцеляеши, враги и супостаты от нас отгоняеши, жизнь нашу умиряеши и душам нашим полезная подаеши, да благодарственно взываем Богу: Аллилуиа.

Икос 12

Поем честныя подвиги твоя, ублажаем чистое житие твое, восхваляем священную память твою, Данииле благоверне, и, прославляюще Господа всех, вопием ти сице:

Радуйся, яко крест богоугоднаго жития до конца понёсл еси́;/ радуйся, яко о скорбех твоих Бога благодарил еси́.

Радуйся, всяку добродетель в себе изобрази́вый;/ радуйся, иго Христово возлюбивый.

Радуйся, немощи немощных на себе носивый;/ радуйся, благоволение Божие людем твоим испросивый.

Радуйся, присно на Небеси торжеству́й;/ радуйся, на земли преславно чудодействуй.

Радуйся, людем твоим помощниче богодарова́нный;/ радуйся, Ангелом собеседниче досто́йный.

Радуйся, преподобне княже Дани́еле,/ Московский чудотво́рче.

Кондак 13

О преславный угодниче Христов и чудотворче, преподобне княже Данииле, отрадо и утешение всех с верою к тебе прибегающих! Приими от нас, недостойных, сие малое моление, с любовью тебе приносимое, и теплым ходатайством твоим ко Господу огради святую обитель твою, умири жизнь нашу и даруй нам покаяние совершенное, избави нас от бед и вечныя муки, да купно с тобою благодарственно вопием: Аллилуия.

Этот кондак читается трижды, затем 1-й икос: "Ангелов Творец..." и 1-й кондак: "Избранный чудотворче..."